

“ALISHER NAVOIY ADABIY VA ILMIY MEROSONI O’RGANISH MASALALARI”

mauzusidagi 69-ilmiy xalqaro konferensiya materiallari

ALISHER NAVOIY SHE’RIYATIDA INSON TANA A’ZOLARINING QO’LLANILISHI

Zilola Amonova

Buxoro davlat universiteti dotsenti, f.f.d.,
E-mail: zilolajonamonova@gmail.com

Maftuna To‘rayeva

Buxoro davlat universiteti,
Filologiya va tillarni o‘qitish (o‘zbek tili) ta’lim
yo’nalishi 2-bosqich talabasi
E-mail: tmaftuna933@gmail.com

Annotatsiya: Maqolada Alisher Navoiyning lirik merosi tarkibidagi ayrim g‘azallarda qo‘llanilgan somatik birliklar tahlilga tortilgan. Mazkur masala bayonida shoir mahoratiga, ifoda uslubidagi an‘naviylik va novatorlikka ham ahamiyat qaratilgan.

Kirish so‘zlar: yuz, lab, qosh, soch, xol, qad, zulf, oshiq, ma’shuqa.

Аннотация: В статье анализируются соматические единицы, используемые в некоторых газелях лирического наследия Алишера Навои. При описании этого вопроса также акцентируется внимание на мастерстве поэта, традиционности и новаторстве в стиле высказывания.

Ключевые слова: лицо, губа, бровь, волосы, родинка, малия, возлюбленный.

Abstract: The article analyzes the somatic units used in some ghazals of Alisher Navoi’s lyrical heritage. In the description of this issue, importance is also focused on the poet’s skill, traditionality and innovation in the style of expression.

Key words: face, lip, eyebrow, hair, mole, waist, lover.

Alisher Navoiy – turkiy she’riyatni yuksak cho‘qqiga ko‘targan buyuk so‘z san’atkori. Uning umumbashariy g‘oyalari, xususan, to‘g‘riso‘zlik, halollik, adolatsevarlik, poklik, saxiylik, mehnatsevarlik, bag‘rikenglik, vatanparvarlik, do‘slik, ilmsevarlik kabi o‘lmas g‘oyalari jahon madaniyati taraqqiyotida sezilarli ta’sir o‘tkazgan. Navoiy oshiqona g‘azallarida mahbubaning go‘zal portretini chizadi: uning qomati, qoshlari, kipriklari, lablari, tishlari kabi go‘zallik uzvlarini betakror tasvirlar, nozik iboralar orqali ifodalaydi. Fikrimiz isboti sifatida quyidagi baytni tahlilga tortamiz:

*Yuzidinkim xijildir gul, parishon har taraf kokul,
Sochib gulbarg uza sunbul, to‘kub kofur uza anbar [1.184].*

Baytda ma’shuqa husni uning go‘zallik uzvlarining ta’rifi orqali yoritilgan. Jumladan, yor yuzi shu qadar go‘zalki, hattoki, gullar ham uning yuzidan xijolatda. Har tarafga yoyilgan kokillari esa parishon. Bu go‘yoki gul bargi uzra sunbulning sochilishi, ya’ni kofir uzra anbarning to‘kilishi kabidir. Ulug‘ shoir gul bargi orqali yorning yuzini, sunbul orqali sochini, kofur deganda ma’shuqaning oppoq ko‘rkam

“ALISHER NAVOIY ADABIY VA ILMIY MEROSONI O’RGANISH MASALALARI”

mauzusidagi 69-ilmiy xalqaro konferensiya materiallari

chehrasini, anbar bilan yorning xushbo‘y qora sochlarini nazarda tutadi. Ijodkor istiora san’atining imkoniyatlaridan unumli foydalanib, o‘z mulohazalarini badiiy ifodalagan. Shuningdek, tanosiblar guruhi ham baytda badiiylikni ta’milagan: yuz, kokul; gulbarg, sunbul.

Ta’kidlash lozimki, shoirning ko‘pgina she’rlarida yorning xushbo‘y qora sochining ta’rifi keltiriladi. Sharq musulmon xalqlarida, jumladan, o‘zbeklarda xotin-qizlar sochining uzunligiga alohida e’tibor qaratilgan. Qolaversa, qizlarning sochlari uzun bo‘lishi uchun maxsus muolajalar ham ado etilgan. Shu nuqtayi nazardan, mumtoz adabiyotimizda ham uzun soch o‘ziga xos go‘zallik belgisi sifatida tilga olinadi. Alisher Navoiy ijodida ham ayni jihatni ko‘rish mumkin:

Zulfi egniga yetar gar sochi yerga sudralur,

Tengdurur qaydim uchun gar bir - qarish, gar yuz quloch [2.85].

Baytda qayd etilishicha, yorning zulfi engi (yonog‘i)ga yetadi, ammo uning sochlari esa yerga sudraladi. Lirik qahramon ma’shuqaning “bir - qarish” zulfiga va “yuz quloch” sochiga maftun bo‘lib, bularning har ikkisi ham “qaydim” (bog‘lanishim) uchun tengdir, deya e’tirof etadi. Shoир nazdida bir qarich bo‘lsa-da, zulfnинг mavqeyi yuz quloch bo‘lgan sochdan kam emas. Ya’ni oshiqning ularga bo‘lanishida soch va zulf bir xil o‘rin egallaydi. Mazkur bayt oshiqning ma’shuqa zulfi va sochlari ga asir bo‘lib qolishiga bo‘lgan iqrordan dalolatdir. Baytning badiiy ta’sirchanligi ulug‘ shoirning zulf va soch tanosibidan mohirona foydalanganligida ham ko‘rinadi. Yana bir necha baytlarda ham ma’shuqa sochlaringin ta’rifini ko‘rish mumkin. Bunda soch bilan birgalikda yorning boshqa tana a’zolarini ham madh etadi:

Soching qarong ‘u tun, ey sarvqadi shirin lab,

Yuzung tun o‘rtasida jilva aylagan kavkab [2. 51].

Baytga e’tibor qaratsak, yorning sochi, qaddi, labi, yuzining ta’rifi keltirilgan. Shoир tanosib bilan tashbehdan unumli foydalanib, fikr ta’sirchanligiga erishgan. Ya’ni soch, qad, lab, yuz tanosib san’atining asosi bo‘lsa, ularning asosli narsa-predmetlarga o‘xshatilishi esa tashbehni hosil qilgan. Masalan, soch – qorong‘u tunga, qad – sarvga, yuz – kavkab (yulduz)ga. Bu o‘rinda “shirin lab” sifatlashi ham yanada jozibadorlikni ta’minalashga xizmat qilgan. Demak, shoир yorning go‘zallik uzvlari sifatida somatizmlarni birma-bir ta’riflab, ularning ko‘rinishi va holatini tashbeh vositasida ifodalagan. Bu esa ma’shuqa jamolining ta’rifida somatizmlar muhim o‘rin tutishini ko‘rsatadi. Yuqorida baytlarda yuz va kokul, qad, lab orqali yorning go‘zalligi madh etilsa, quyidagi baytda esa shular bilan bir qatorda yorning chiroyli xoli ta’rifi keltiriladi:

Yuzungda xol safhada tomgan kabi qora,

“ALISHER NAVOIY ADABIY VA ILMIY MEROSONI O’RGANISH MASALALARI”

mauzusidagi 69-ilmiy xalqaro konferensiya materiallari

Xoling malohati tuz erurkim qorada bor [2. 149].

Ushbu bayt ham nihoyatda ajoyib ifodaga ega. Dastlab ma’shuqaning yuzi qog‘oz sahifasidek oppoq ekanligi aytildi. Mana shu yuzdagi xol qog‘oz sahifasiga tomib tushgan qora siyohga o‘xshatiladi. Xolining chiroyi to‘g‘ri chizilgankim, chunki unda qoralik bor. Ko‘ryapmizki, ikkinchi misrada Navoiy o‘zi tasvirlagan fikrni ma’qullagandek xolga aniqlik kiritadi. Bunda qora-xol, safha - yuz parallel qo‘yilgan. Yuz va xol inson tana a’zosi sifatida metaforik ma’no ifodalab kelgan. Baytda tashbihdan mohirona foydalanilganligini ko‘ramiz. Shoir baytlarda yorning go‘zal jamolini, uning ta’rif-u tashbehini keltirish bilan cheklanmay, bu chiroyning oshiq ruhiy holatiga ko‘rsatgan ta’sir darajasini ham qalamga oladi:

Shafaqgun yuz hiloliy qosh ila to jilvagar bo‘ldung,

Ko‘zumda bo‘ldi qon zohir, qadimda bo‘ldi ham paydo [3. 49].

Ma’shuqaning “shafaqgun” (qizil rang) yuzlari, “hiloliy” (yangi chiqqan oy) qoshlari bilan “jilvagar” bo‘lishi, oshiqning ko‘zlarida qonning, qadlarida xam (egiklik)ning paydo bo‘lishiga sabab bo‘lgan. Yuzning shafaq rangiga, qoshning hilolga tashbehi an’naviy holat bo‘lsa, ikkinchi misradagi oshiq ko‘zida qon va qaddida xam (egiklik) ning paydo bo‘lishi bir tomonidan birinchi misradagi tashbehlarini to‘ldirsa, ikkinchi tomonidan o‘ziga xos novatorlik deyish mumkin. Ya’ni shafaqrang bilan qon, hilol bilan xam (egiklik) ning bir-biriga mos kelishi badiiy ta’sirchanlikni yanada oshirgan. Demak, hilol va xam (egiklik) faqatgina yorning chiroyli qayrilma qoshining tashbehi bo‘libgina qolmay, hijron va ayriliqdan iztirob chekkan oshiq qaddining badiiy tasviri ham bo‘la oladi.

Ulug‘ shoir yor go‘zalligi ta’rifi bilan birgalikda oshiq ruhiy holatiga ham urg‘u berar ekan, bu o‘rinda xalq udumlari, rasm-odatlariga ham e’tibor qaratadi:

Yangi oy ko‘rgach xaloyiq ko‘zni yummoq rasm erur,

Lekin ochildi ko‘rub mushkin hilolingdin ko‘zum [1. 388].

Ma’lumki, xalq orasida yangi oy chiqqach, unga darhol qaralmagan, ya’ni ko‘zni yumib, avval, yangi boshlangan oyning xayrli kelishini tilab duysi xayr qilingan. So‘ngra yuzga fotiha tortilgandan keyin yangi oyga qarash mumkin bo‘lgan. Shoir ana shu xalq udumining “buzilish sababini” ikkinchi misrada keltiradi. Ya’ni ma’shuqaning yangi oy kabi qoshlarini ko‘rgan oshiqning ko‘zları yumilish o‘rniga, aksincha, go‘zallik va latofatidan ochiladi. Baytdagi sifatlash (mushkin) hamda istiora (hiloling) san’atlari fikr ifodasida ta’sirchanlikni ta’minlagan.

Mumtoz adabiyotimizda yaratilgan oshiqona g‘azallarda an’naviy holatda ma’shuqa jafokor, haqiqiy oshiqqa bee’tibor, oshiq esa ma’shuqadan iltifot umidvor

“ALISHER NAVOIY ADABIY VA ILMIY MEROSINI O’RGANISH MASALALARI”

mauzusidagi 69-ilmiy xalqaro konferensiya materiallari

bo‘lgan jafokash sifatida ifodalanadi. Hazrat Navoiy ham ushbu an’ananini davom ettirar ekan, o‘ziga xos tarzda yondashadi:

Yor og ‘iz ochmasqa dardim so ‘rg ‘ali toptim sabab,

Ko ‘p chuchuklikdin yopishmishlar magar ul ikki lab [2. 35].

Oshiq o‘z ma’shuqasining uning dardidan, ahvoldidan xabar so‘ramasligining “sababi”ni kashf etadi. Ya’ni yorning lablari shu darajada “chuchuk”ki, bu sababdan “yopishmishlar magar ul ikki lab”. Shu bois u oshiq ahvolini so‘rash uchun og‘iz ocholmaydi. Baytda qo‘llanilgan tanosib va mubolag‘a orqali original tasvir yaratilgan. Shuningdek, ma’shuqaning oshiq ahvolini so‘ramasligining shoirona sababi – husni ta’lil kitobxonning yanada hayratga soladi. Ushbu misralardagi fikrlarga hamohang yana bir baytni ko‘rish mumkin. Quyidagi she’r parchasi mazmunan yuqoridagi misralar bilan bog‘lansa-da, ifoda uslubi va fikr ta’sirchanligi bilan ajralib turadi:

Lablaringkim hayf erur teng tutmoq ani qand ila,

Sindurur yuz qand bozorini shakkarxand ila [3.415].

Keltirilgan ushbu misrada ham yor lablarining shakar kabi shirin ekanligi, hatto, qand bilan ham uni teng tutmoqlik hayf ekani ta’kidlanyapti. Bu lablarning bir shirin tabassumi yuz qand bozorini ham kasodga uchratadi. Chunki uni ko‘rgan kishilarning qandga ehtiyoji qolmaydi. Natijada qand bozori kasodga uchraydi. Mubolag‘aning o’rinli qo‘llanilganligi fikr ta’sirchanligini yanada oshirgan.

Aytish mumkinki, Navoiy g‘azallarida ma’shuqaning tana a’zolaridan: yuzi oyga, porloq tongga, safhaga, yulduzga, quyoshga, lolaga; qoshi egilgan yoyga, yangi hilolga, mehrobga; qaddi sarvga, alifga; lablari shakarga, qand-u nabolga, o‘ymoqqa, zarrachaga, la’lga, gulg‘unchaga; xoli nuqtaga; kipriklari o‘q - yoyga, nayzaga, tikanga; sochlari ilonga, yaldo tuniga o‘xshatib, har birida o‘ziga xoslikka erishilgan. Shuningdek, zulfi, xoli, sochlari bir umumiylit ostida, ya’ni xushbo‘y mushki anbar kabi ekanligini aytsa, lablarining qon, anor kabi qizilligi tavsiflanadi. Demak, inson ta’na a’zolari va ularga oid tashbehlar ijodkor fikrlarining badiiy ifodasiga xizmat qilgan.

Adabiyotlar ro‘yxati:

1. Навоий Алишер. Муқаммал асарлар тўплами. XX жилдлик. I жилд. Бадоев ул-бидоя. – Тошкент: Фан, 1987. – 689 б.
2. Навоий Алишер. Муқаммал асарлар тўплами. XX жилдлик. II жилд. Наводир ун-ниҳоя. – Тошкент: Фан, 1987. – 622 б.
3. Навоий Алишер. Муқаммал асарлар тўплами. XX жилдлик. III жилд. Гаройиб ус-сифар. – Тошкент: Фан, 1987. – 575 б.

**“ALISHER NAVOIY ADABIY VA ILMIY MEROSINI
O‘RGANISH MASALALARI”**

mauzusidagi 69-ilmiy xalqaro konferensiya materiallari

4. Навоий асарлари лугати. Тузувчилар: П.Шамсиев ва С. Иброхимов. Тошкент: Г. Фулом номидаги адабиёт ва санъат нашриёти, 1973. – 784 б.
5. Amonova Z. Jamoling mus’hof (mus’hof countenance) //Центр научных публикатсий (buxdu. uz). – 2021. – Т. 8. – №. 8.
6. Amonova Z. Husayniyning badiiy mahorati //Центр научных публикатсий (buxdu. uz). – 2022. – Т. 16. – №. 16.
7. Amonova Z. K. The image of Mansour Hallazh in Mashrab's poetry //image. – 2020. – Т. 1. – С. 26-2020.